

*Cuaders dal Centri Interdipartimentâl
pe Ricercje su la lenghe e la culture dal Friûl*

Quaderni del Centro Interdipartimentale
per la Ricerca sulla lingua e la cultura del Friuli

**Contribuzion par une
bibliografie (1945-1997)**



PRESENTAZION

Il Centri Interdipartimentâl pe Ricercje su la lenghe e la culture dal Friûl (CIRF) al nassè dal 1995 par rivâ l'atuazion dai fins che la leç institutive de Universitât di Udin e assegnave al Ateneu; vadî "judâ il disvilup sociâl e la rinassince economiche dal Friûl e deventâ imprest pal disvilup e par rignuvî i filons origjinâi de lenghe, de storie e des tradizions dal Friûl". Daûr di ce che al dîs l'art. 1 dal Statût di Autonomie de Universitât, il CIRF al à di "promovi il disvilup e il progres de culture e des siencis cu la ricercje, l'insegnament e la colaborazion scientifice e culturâl cun istituzions italianis e forestis, par dâ une man al disvilup civil, culturâl, sociâl e economic dal Friûl".

La bibliografie dai tescj vignûts fûr in lenghe furlane dal 1945 al 1997 e scree une gnove golaine di publicazions destinadis a dâi vivôr tal ambient culturâl di chenti ae produzion in cont di lenghe e culture furlane elaborade de Universitât. Par fâ chest, dutcâs, l'Universitât no intint di sierâsi; e ûl, invecit, cirî la colaborazion sul teritori cun cultôrs di materiis furlanis, cun sociis specializadis intun cualchi argument di ricercje, cun instituzions disponudis a lavorâ par une plui grande valorizazion e promozion de lenghe e culture furlane. La bibliografie e nas e e realize za chescj obietîfs, dal moment che e ven fûr de colaborazion cun l'Union Scritôrs Furlans, une instituzion che za di ains e ten il cont dai libris stampâts in lenghe furlane.

Dentri di chest an si varà altris publicazions che a nassin in graciis dai finanziaments dal Consorzi Universitari dal Friûl (CUF) par une borse di ricercje spindude dal 1997 e rignuvide pal 1998. L'ativitat di ricercje e je difat fondamentâl par tirâ su une gnove cussience furlane, ch'e vebi par fonde il madressi comunitari des sengulis corints di interès presints te nestre societât. No si pues fâ di mancul di cirî, di sgarfâ tal grant patrimoni di umanitât e di culture che al esist in Friûl: cheste finalitat e jere ben clare tal cjâf di chei che cheste Universitât le àn volude cun dutis lis lôr fuarcis e si augurin ch'e cjati gnûfs testimonis intai students che inte Universitât a studiin in dì di vuê.

*Il Diretôr dal CIRF
Prof. Raimont di Strassolt*